



VERSCHNUUFFER GNEPF

Zeedel Verschnuuffer Gnepf 2026

Mr luege zugg und lauffe vorwärts

Stigsch bi mir in Käller aabe
Und duesch di duur dr Grimpel graabe
Wiirsch zimligg gli, gaar nid wit hinde
Die alte Fasnachtsglaider finde
D Larve und d Goschdym, die griene und roote.
Ha-n-ych dir aigentlig scho mol verroote
Wie-n-ych zem Fasnächtler worde bi?
Y weiss es, als wäär's erscht geschter gsi

Dozmol bi-n-y mit e baar Frind
S erscht Mol an d Fasnacht, alli no Kind
Dr Zauber het ys sofoort ergryffe:
«Lueg die Ladäärne und loos, wie si pfyffe!
Wie scheen die Basler Fasnacht ka syy!
Mi Brueder het Bäch, dä stoht uff de Schii!»
Ai Clique aber sticht bsunders hervor
Y weiss es no guet, nach all däne Joor
Mr bliibe stoh und luege genau
D Goschdym sinn heerlig, d Ladäärne isch schlau
D Pfyffer laade zem Mitsumme-n-yy
Dr Taggt vo de Tamboure hilft ys drbyy
Dä Aabligg zieht ys ruggzugg in sy Soog
«Wär isch äggscht das?», stelle mir ys als Froog
Do druggt ys dr Vordraab e Zeedel in d Hand
«D Verschnuuffer Gnepf!», riefe mir mitenand
S isch Schiggsaal, Zuefall – nenn's, wie's dr gfallt
Uff jede Fall mache d Gnepf grad e Halt
Diräggd vor ys, mr hän beschiht Sicht
Uff jedes ainzelne Verschnuuffer-Gsicht
Wo under de Larve zem Vorschiin kunnt
Und straale duet, trotz spooter Stund
Si wirgge so gligglig, dien schwätze und lache
Als gäb's nyt Scheeners, als Fasnacht z mache
Mr luege-n-ys aa, es bruucht nur e Nigge
Und scho sueche mr s Gspröoch mit dr Clique
Mir stupse sy aa und frooge ganz offe:
«Mir hän ys zwoor no gar nie droffe
Und ainewääg sinn mir fasziniert
Wie d Fasnacht bi eich wird zelebriert!
Was isch eier Ghaimnis, was macht eich so froo
Ass d Lyt sich umdraaie und blyybe stoo?»
D Verschnuuffer lache, dr Stolz im Gsicht
«Das stimmt, es isch e scheeni Gschicht
Mir mache Fasnacht, mit Härz und Verstand
Es isch unser Läbe, es isch unser Band
Was ys verbindet, isch mee als nur d Zyt
S isch Fründschaft und Zämmehalt, wo's bi-n-ys git
Mr hänn langi Naase, s isch trotzdäm nid glooge:
Mr dien ys halt lieber hälfe statt blooge
Mir stöön fyrenand, bi Fraid und bi Groll
S het jeede si Blatz, das macht's eso toll!»
Si verzelle vo iire Sujets mit Gfiel
mol wild, mol zäärtlig, mit Stiil allewyyl.
Aimol isch's Sujet dr Kinderzoo gsi
Mol d IWB, denn s Tamagotschi
Denne d Aiheerner, mit Hoffnig im Bligg
Inere Wält voll Stress verbraite sy Gligg
Und denn, ganz pink, e knallige Blitz:
Barbie und Ken, mit vyyl Charme und Witz.
Mir loose und gspyyre: e Häärz schloot doo
fyr d Fasnacht, Weermi und s Zämmestoo.
Do isch eppis Bsunders, das merkt me sofoort
Drum wänn mir dezue, s isch glaar, ohni Woort.

Das isch dr Aafang vo miner Gschicht
Bi de Verschnuuffer, und me verspricht
Ass noch fuffzig Joor Gnepf dr Schnuuf no längt
Und aim die Clique no wyter beschänggt
Mr nutze die Glägehait und luege zugg
Bis ganz an d Aafäng schlöön mir d Brugg
Zem Däni, dr Ursi und no mee Legände
Die Gschichte z verzelle wurd niemolls ände
Aaber mr lauffe au voorwärts, es heert jo nid uff
S isch gly wieder Fasnacht – und d Gnepf brenne druff!

D Ladäärne-Uusstellig uff em Minschterplatz und d Waage-
und Reggwisyte-Uusstellig bi dr Kasärne sin vom Määntig znacht
bis am Mittwuch demoorge! Deert und an de Verkaufsständ (CINS)
in dr Stadt ka men au alli Zeedel und Schnitzelbängg
und d'Blagedde kaufe.

Bisch e Kind, mechtsch Fasnacht mache,
denn gits kaini halbe Sache!

So schrib denn unseri Obfrau aa
und mäld Di gschwind zem Yyschtooo aa.

Yyneluege: Samschtig 07.03.2026

11.00 – 13.00 Uhr im Cliquekäller an dr Malzgasse 9 in Basel

Mir fraie uns uf Di!

Fir Informatione mäldsich Di bi dr Obfrau:

Céline Ryffel, Verschnuuffer Gnepf, Malzgasse 9, 4052 Basel

E-Mail: gnepf@verschnuuffer.ch